



NATIONAL SENIOR CERTIFICATE EXAMINATION
NOVEMBER 2023

**SEPEDI LELEME LA GAE: LEPHEPHE LA II
SEPEDI HOME LANGUAGE: PAPER II**

MARKING GUIDELINES

Nako: Diiri tše 3

Meputso: 100

These marking guidelines are prepared for use by examiners and sub-examiners, all of whom are required to attend a standardisation meeting to ensure that the guidelines are consistently interpreted and applied in the marking of candidates' scripts.

The IEB will not enter into any discussions or correspondence about any marking guidelines. It is acknowledged that there may be different views about some matters of emphasis or detail in the guidelines. It is also recognised that, without the benefit of attendance at a standardisation meeting, there may be different interpretations of the application of the marking guidelines.

KAROLO YA A DINGWALO

POTŠIŠO YA 1

LEHUFA – MOTHUPI, P. 2011

Thulano

Thulano ke dikgakgano tšeo di tšwelelago ka pukung gare ga baanegwa. Thulano e tšweletšwa ke ge moanegwa a thulana le dikgopolo tša gagwe goba le tša baanegwa ba bangwe. Go na le mehuta ye mebedi ya thulano e lego thulanogare le thulanontle. Thulanogare e tšwelela ge moanegwa a thulana le kgopolo ya gagwe goba tikologo ya gagwe. Thulanontle e bonagala ge baanegwa ba babedi goba go feta ba thulana ka mantšu goba go lwa ka diatla. Dithulano di tšwetša thulaganyo ya sengwalo pele gomme ka thulaganyo yeo ya ditaba mongwadi o utolla morero wa sengwalo.

Go se kwešišane le dikgakgano tšeo di hlolwago ke lehufa tiragatsong ye.

Thulanontle

- Ntlogeleng o hwetša dinomoro tša Lerato tša mogala ka morabeng wa paki ya monna wa gagwe. O a befelwa ka ge a nagana gore monna wa gagwe o mo sepela ka fase o ya go yena a di swere. Ntlogeleng o botšiša ka bogale gore dinomoro ke tša mang, a thoma go foša Ntshepe ka mae a go bola.
- Ntlogeleng le Ntshepe ba lwa ntwaga ya matsogo ka ge Ntlogeleng a mo naganela gore o ratana le Lerato. Ntlogeleng o hlapaola Ntshepe, o mmitša ka maina a ba a mo tshwela ka mare. Ntshepe o a befelwa, Ntlogeleng a mo kgoromeletša thoko. Ntshepe o mo itia ka ntahle a mo lahlela fase.
- Ntlogeleng o latelela Lerato mošomong wa gagwe o mo hlabela lešata ka ge a mo latofatša ka go ratana le monna wa gagwe ebile o re o na le bohlatse e lego dinomoro tša Lerato tša mogala tšeo a di hweditšego ka morabeng wa paki ya monna wa gagwe. Ba tšeana ka mantšu go fihlela Monamudi a ba tsena gare.
- Radithekisi o kitimiša Lerato ka molamo o nyaka go mmetha ka gore o kwele banamedi ba thekisi ba bolela gore mosadi wa Ntshepe o hlwele a mo lateletše mošomong, gomme o nagana gore ke nnete Lerato o ratana le Ntshepe.
- Radithekisi o betha Lerato morago ga go bogela bidio ya Lerato le Ntshepe ge ba le motheleng, ebile Lerato o robala bookelong, Radithekisi ga a ye go mmona.
- Samorebana o kgakgana le Lerato ka dikakanyo ge a mo laela gore a hlale Radithekisi, Lerato o gatelela gore o rata Radithekisi. Samorebana o re le ge ba ka rapela bjang le bjang Radithekisi a ka se tsoge a fetogile. O re a ka itoma setšu ge a ka fetoga.
- Ntshepe o thulana le Ntlogeleng ka mantšu ka ge a mo hweditše a tšhela dihlare tša nkadingala dieteng tša gagwe. Ntshepe o laela Ntlogeleng gore ge a boa a se mo hwetše ka ge a ka se dule le mosadi wa moloi.
- Radithekisi o laela Leepo le Tsarane gore ba bolaye Ntshepe ka ge a mo tšeela mosadi wa gagwe Lerato. Ge ba sa mmolaye ka pela o fela pelo ebile o ba laetša sethunya gore se tla ja bona.
- Radithekisi o latelela Lerato ka kerekeng a mo hwetša a sa rapela. O a mo ntšha, o tsena le yena sefatanageng gomme o ema lebenkeleng o reka sešepa sa dikolobe gomme ge a fihla gae o mo gapeletša gore a hlape ka sona ka letangwaneng la go rutha go fihlela se felelela gore a tloše ditšhila tša banna bao a ratanago le bona ka moka.

- Leepo le Tsarane ba thuntšha Letlabo ba nagana gore ke Ntshepe, ge Letlabo a hlaba mokgoši Mpheng le Ntshepe ba tla ba kitima, Mpheng a thuntšha Tsarane a wela fase.
- Radithekisi o kgakgana le mosadi wa gagwe ka mantšu ge a leka go boledišana le yena pele a eya mošomong. Ge Lerato a mmošša gore go na le tabanyana ye e sa mo swarego gabotse, e lego segwera sa gagwe le Leepo, Radithekisi o a befelwa.
- Radithekisi o kgakgana le Leepo le Tsarane ka ge ba ipaletšana go bolela gore ba humane eng ge Radithekisi a be a ba rumile gore ba šale Lerato morago go lekola ge a sa ratane le banna ba bangwe. Radithekisi o a befelwa o ba tshephiša go ba bula melongwana ye ka sethunya/go ba thuntšha ge ba sa phethe thato ya gagwe.

Thulano ya ka gare:

- Ntlogeleng o lwa le megopolo ya gagwe ka morago ga gore monna wa gagwe a mo sware a tšhela dihlare ka dieteng tša gagwe. O bolela a nnoši gore go na le gore a tšwe ka gae e be e le gona motse o thubegile a ka upše a ipolaye. O tšea thapo o itekeletša ka karatšheng.
- Lerato o lwa le megopolo ya gagwe ge a eme boemapese a tlaišwa ke dinamelwa. O ipotšiša gore ke ka lebaka la eng a tlaišega mola monna wa gagwe a na le difatanaga. O ipotšiša gape gore Radithekisi monna wa gagwe yena o kwa bjang.
- Lerato o thoma go lemoga gore o rata Ntshepe, gomme o ipotšiša dipotšišo tše dintši gore e ka ba o tsenwe ke eng ka ge a nyetšwe ebile a rata Radithekisi.
- Radithekisi o thulana le megopolo ya gagwe morago ga go hlalwa ke Lerato, le kgwebo ya gagwe e se sa sepela gabotse. O fetša ka go ithuntšha a leka go ipolaya efela o a palelwa, o išwa bookelong.
- Ge Ntshepe le Lerato ba arogane, Ntshepe o šala a ipotšiša dipotšišo ka taba ya monna wa Lerato yo a nyakago go mmolaya. O ipotšiša gore o bolaelwang ka ge a sa ratane le Lerato. Ntshepe o re taba ye nngwe yeo e sa mo fetišego gabotse ke ya Lerato ge a re a ka bolaya monna wa gagwe gore a kgone go šala a ipshina le yena. O ipotšiša gore e ka ba Lerato o a mo rata na?

Kabo ya meputso

Teori

Dintlha

Tšhomišo ya polelo

POTŠIŠO YA 2

BADIMO BA BOLETŠE – MPEPELE, J. M. 2014

Thulaganyo – Thulaganyo ke mokgwa wo mongwadi a beakanyago ditaba tša sengwalo sa gagwe ka gona ka maikemišetšo a go tšweletša morero. Diponagalo tša thulaganyo ke tše di latelago: kalotaba, phekgogo, thulano, sehloa le tharollo ya bothata/tlemollohuto.

1. Kalotaba – Kalotaba ke matseno a ditaba tša sengwalo. Seripeng se sa thulaganyo go tšweletšwa baanegwa le tswalano ya bona, tikologo (nako le felo), tiragalokgolo/kgopolokgolo.
 - Kgoši Tsweke wa Bakone ge a hlokofole o tlogela molaetša wa gore Ditaui o swanetše go nyala Thabišo morwedi wa kgoši Pilošamadiba pele a ka tsokama setulo sa bogoši.
 - Ditaui morwa mohu kgoši Tsweke ke molwantšhwa mola mmagwe Komanyi e le molwantšhi.
 - Ditaui o ganana le kgopolo ya go kgethelwa mosadi ka ge a nyaka go ikgethela mosadi yo a ratwago ke yena mong.
 - Senyama le Makgabo e lego banna ba mošate wa Bakone ba bonala tseleng ya go tšwa sethokgweng sa Rakabaele ba boledišana ka taba ya Ditaui ya go gana go nyala Thabišo.
 - Go fihleng ga bona kgorong ya mošate ba hweditše banna ba ipshina ka bjala bja setšo.
 - Bontši bja ditiragalo bo diragala motseng wa Bakone.
2. Phekgogo/sethakgodi – Phekgogo ke tiragalo ye e hlolago thulano ya mathomo sengwalong.
 - Ditaui o ratana le Mpimpi yo e lego lekgarebe la mo motseng ebile o a mo imiša, ge a botšwa ka taba ye o gana go rwala maikarabelo a ditiro tša gagwe.
3. Thulano – Thulano ke dikgakgano tše di tšwelelago sengwalong magareng ga baanegwa go tšweletša morero wa puku.
 - Ditaui o gana go rwala maikarabelo a mpa ya Mpimpi ebile o betha Mpimpi ge a mmotša ditaba tše.
 - Ditaui o thulana le malomeagwe Kgokolo le mmagwe ge ba mo lemoša gore ke nako ya gore a tšee seo e lego sa gabo go rangwaneagwe Rašuwana, efela gore seo se direge, o swanetše go nyala Thabišo go phethagatša taelo ya mohu tatagwe Tsweke. Ditaui o ganana le polelo yeo ya go nyala Thabišo.
 - Kgoši Pilošamadiba o thulana le mosadi wa gagwe le bakgomana ba mošate e lego Mabina le Mothofela ka mantšu ka ge ba se ba mmotša ka ketelo ya barongwa ba kgoši Manamela ya go tlo kgopela sego sa meetse.

4. Sehloa – Ke thulano ya mafelelo ya sengwalo yeo e tlišago tharollo ya bothata.
- Ditaui o a lwala ebile setšhaba se thoma go gakanega gore kgoši e tla ba mang.
 - Morago ga ketelo ya barongwa ba kgoši Pilošamadiba kua ga bo Ditaui go kgethwa dikgomo tša go yo nyala Thabišo.
 - Komanyi mmago Ditaui o gopola ka ngaka ya Kgoši Tsweke e lego Mpotše gore a tle a laole le go fokafoka lapa la gagwe gore ba tsebe gore seo se dirago go re Ditaui a gane go nyala Thabišo ke eng?
5. Tlemollohuto/Tharollo ya bothata – Ke ka fao bothata bo rarologago gomme ditaba tša boela maamong. Ditaui o a alafša bolwetšing bja gagwe gomme o thoma go rata Thabišo gomme o fetša ka go mo nyala.
- Morago ga lenyalo Bakone ba bea Thabišo setulong sa go ba mmakgoši.
 - Ditaui ga a sa nyaka go bona Nthuše ebile (Nthuše) o tšea sephetho sa go boela gagabo.
 - Ditaui le Thabišo ba ba le bana ba mafahlana, wa mošemane le wa mosetsana.
 - Ditaba di boetše sekeng motseng wa Tsweke, ke šebešebe. Rašuwa o boile gae ba swarelane le Komanyi pele a hlokofala.

Meputso

Teori

Dintlha

Tšhomišo ya polelo

GOBA

POTŠIŠO YA 3

TŠA LEFASE GA DI FELE – MATSHELA, M. F. C. et.al 2004

'O SWERE JACKPOT'

(a) Matseno

Matseno ke mo ditaba tša sengwalo di thomago gona.

- Matseno a kanegelokopana e swanetše go ba a makopana a go ba le maatlakgogedi. Mongwadi o swanetše go tšweletša moanegwathwaadi, bothata bjo a lebanego le bjona le tikologo ya ditiragalo.
- Mongwadi o atlegile mo ntlheng ya matseno a kanegelokopana ka ge e le a makopana a maatlakgogedi.
- Mmadi ge a bala matseno a kanegelokopana ye o duma go tseba gore ke eng seo Megabaru a se dirilego sa go ba goboša ka tsela ye gore ba be ba kobje mo motseng.
- Mongwadi o tšweleditše moanegwathwaadi e lego Megabaru.
- Tabakgolo ye go lebanwego le yona kanegelokopaneng e tšweletšwa ke go kobja ga mmago Megabaru ka ge go na le seo Megabaru a se dirilego.
- Tikologo ye e tšwelelago mo matsenong ke ya sebjalebjae ka ge ba bolela ka moletakgolego.

(b) Tikologo

Tikologo ya sengwalo ke lefelo la ditiragalo tša baanegwa ka nako ye e rileng. Tikologo e lebane le nako le felo. Go na le mehuta ye mebedi ya tikologo e lego tikologo ya sebjalebjae le ya segologolo. Mehuta ye ya tikologo e laolwa ke diteng tša sengwalo.

- Tikologo ya kanegelokopana ye ya 'O swere *jackpot*' ke ya sebjalebjae. Tšeo di laetšago tikologo ya sebjalebjae ke tše:

Nako

- Go dirišwa dikuranta
Ditaba tša polao ya monna wa Megabaru, Lenkwang di tšere nako di tšwelela dikuranteng batho ba kgotsa.
- Go bolelwa ka maphodisa, moletakgolego le kgolego.
Monna wa GaMphahlele o rile ge a bone setopo a hlaba mokgoši maphodisa a tla a thuša. Maphodisa a bonala gape ge a swara babolai ba Lenkwane. Megabaru o kgolegongkgolo ya Tshwane, New Lock Pretoria Central Prison.
- Go bolelwa ka di *jackpot*.
Lentšu le la '*jackpot*' le šomišwa ke Megabaru, kudu ge a bona motho a swere tšhelete, le ge e ka ba ya matshedišo, go yena ke '*jackpot*'.
- Go bolelwa ka dikolo
Lenkwang e be e le hlogo ya sekolo sa Matlebjane, motseng wa Thabampshe gona GaMasemola. Ke monna wa go loka wa go ratwa ke barutwana le barutiši ba sekolo sa gagwe.

- Go dirišwa difatanaga
Sefatanaga sa babolai ba Lekwang ke Jetta ye khubedu, le batlaiši ba Mologadi ba be ba le ka yona Jetta ye khubedu.
- Go bolelwa ka tšhelete ya phenšene le diinšorentshe
Megabaru morago ga lehu la monna wa gagwe Lenkwang o ile a humana tšhelete ya phenšene le ya diinšorentshe.
- Go šomišwa dithunya
Mologadi ge a felegetša Megabaru morago ga go re Megabaru a tle go kgopela tshwarelo mabapi le ka fao a boletšego le yena ka gona mosegare, Mologadi o makala monnatsoko a mo šupa ka AK47 a mo gapeletša go tsena ka sefatanageng. Gape go ba le mothuntšhano wa dikebekwa tša Jetta e khubedu le maphodisa.
- Go bolelwa ka difatanaga
Mootledi wa Jetta ye khubedu ka ge a nwele bjala o thula kgomo gomme sefatanaga sa bona se senyega radietara e tšholla meetse. Ge ba leka go humana thušo go sefatanaga seo se tlogo, ba lemoga gore ke sa maphodisa ba thoma go thuntšha.

Felo

Lefelo le tšweletša mo ditiragalo tša kanegelo di diregago gona.

- Go tšwelela mafelo a go swana le New Lock Pretoria Central Prison.
Ke mo Megabaru a ikhwetšago a le gona ka lebaka la megabaru ya go bolaya monna wa gagwe le go leka go bolaya Mologadi ka ge a re o tseba kudu.
- Go bolelwa ka mafelo a go swana le Carousel le Morula Sun.
Megabaru o botša Mologadi gore o swere *jackpot* sesolo ntle le go ya Carousel goba Morula Sun, e tšile boleta ka ge le yena a se a senye tšhelete ka go godiša ngwana yo a hlokofetšego.
- Go šomišwa mafelo a go swana le ga magistrata.
Maphodisa a rile go swara monna yo a bego a šetše, ba iša Mologadi ka gae ba mo kgopela gore ka letšatši la go latela a tle ga magistrata ka kua Nebo.
- Go tšwelela mafelo a go swana le Dennilton, Lebowakgomo le Polokwane.
Dennilton ke mo masogana a a dikebekwa a bego a dula gona. Ga Masemola ba tlišwa ke mošomo wo ba o dirago.

(c) Mafetšo

Mafetšo a sengwalo a tšweletša ka fao mongwadi a rumago ditaba tša gagwe ka gona.

Mafetšo a kanegelokopana a swanetše go ba a makopana, mabakeng a mangwe mongwadi a ka diriša phego go ruma kanegelokopana.

- Mongwadi o tloga a atlegile mo ntlheng ye ya mafetšo ka ge mafetšo a gagwe e le a makopana le ge a re utolletše dilo ka moka go se na phego. Megabaru o fetša ka go swarwa.

Meputso

- Teori
- Dintlha
- Tšhomišo ya polelo

KAROLO B DITŠWELETŠWA TŠA TIRIŠANO

POTŠIŠO YA 4

4.1 Lenaneothero le Metsotso

Lenaneothero

- Thoma ka go ngwala tše di latelago:
 - Leina la mokgatlo
 - Letšatšikgwedi, lefelo le nako yeo kopano e swerwego ka yona
 - Pulo le kamogelo
 - Maina a maloko ao a tlilego
 - Maina a maloko ao a kgopetšego tshwarelo
 - Palo le kamogelo ya metsotso ya go feta
 - Ditšwametsotsong
 - Tabakgolo ya letšatši
 - Letšatši la kopano ya go latela
 - Tswalelo

Metsotso

- Tšweletša dintlhakgolo ka boripana
- Efa kakaretšo ya tše di šišintšwego le gore mafelelong go kwanwe bjang
- Ngwala ka lebaka le le fetilego
- Tšhomišopolelo, tlotlontšu le maswaodikga e be tše di nepagetšego

GOBA

4.2 Potšišotherišano

Go letetšwe gore molekwa a bontšhe dipotšišo le dikarabo gare ga mmotšiši le mmotšišwa. Tšona di akaretše dimpho tšeo ba gopotšego go di fa batšofadi le mabaka a mošomo woo. Sebopego le diponagalo/dinyakwa.

- Go be le mmotšiši le mmotšišwa
- Go fiwe maina a diboledi ka lehlakoreng la ngele la letlakala
- Go šomišwe mothaladi wo mofsa go laetša seboledi se sengwe le se sengwe se sefsa
- Mmotšišwa a hlohlwe ka go botšišwa dipotšišo tša go lebana le kgopolo ya bona ya go fa batšofadi dimpho
- Go šomišwe dithekniki tša potšišotherišano go ya ka magato a a latelago:
 - Matseno e lego boitlhalošo a tšweletše morero
 - Kwešišano le kamogelano e be tša go hlola moya wa go tshepana
 - Mmotšiši a botšiše dipotšišo go thoma ka tša kakaretšo go ya go tša go ikgetha
 - Dipotšišo e be tša maleba, go šomišwe polelo ya go hlamega, ya go laetša šedi le go hlohleletša
- Mmotšišwa a arabe ka botlalo le bokgwari go laetša tsebo

LE

POTŠIŠO 5

5.1 Pego ya kuranta

Pego e be mabapi le ditiragalo tša mokato wa Durban July.

Molekwa a ka tšweletša tšeo di latelago:

- E be ka lepokisaneng
- E be le leina la kuranta
- E be le letšatši la beke, letšatšikgwedi le lefelo la tiragalo
- Hlogo ya taba yeo go begwago ka yona e be le maatlakgogedi (ka ditlhakakgolo)
- Mmegi le lefelo la pego
- Sebopego sa ditemana tša diteng e be sa pego

GOBA

5.2 EMEILE

Diteng tša sererwa: Go letetšwe gore molekwa a fe tshedimošo ye a nago le yona mabapi le bolwetši bjo bo hlasetšego dinagamabapi.

Sebopego le diponagalo/dinyakwa:

- Sebopego le botelele e be tša maleba
- Atrese ya emeile ya moromelwa
- Hlogo yeo e laetšago lebaka la go romela emeile
- Madume/matseno e be a makopana a semmušo mohlala: Mohlomphegi
- Diteng e be tša maleba tša go fa Tona ya Maphelo tshedimošo ka bolwetši bjo bo hlasetšego dinagamabapi
- Retšistara le polelo e be tša semmušo
- Segalo e be sa maleba
- Tšhomišopolelo, tlotlontšu le maswaodikga e be tše di nepagetšego
- Mafelelo e be boitsebišo bja mongwadi ka botlalo

Mohlala:

Ke nna

Moetji Masemola

RUBRIKI YA GO SWAYA PADI LE TIRAGATŠO

Dinyakwa	Kelo Meputso 30	O kgonne go fihlelela ditekolo tša bokgoni bja go ikgetha.	O kgonne go fihlelela ditekolo tša bokgoni bja maemo	O kgonne go fihlelela ditekolo tša bokgoni bja magareng	O fihleletše bokgoni bja motheo	Ga go bokgoni
DITENG Dikgopolo tša go tseenelela, peakanyo ya dikgopolo le kwešišo ya sengwalo.	20	Meputso 17–20 <ul style="list-style-type: none"> Dikgopolo le boiphetolelo ke tša maleba tša maemo a godimodimo. Bohlatse bja maemo a godimodimo bja kwešišo ya ditiragalo tša sengwalo. 	Meputso 13–16 <ul style="list-style-type: none"> Dikgopolo tše bofaganego le boiphetolelo bja maemo a godimo. Bohlatse bja maemo a godimo bja kwešišo ya ditiragalo tša sengwalo 	Meputso 9–12 <ul style="list-style-type: none"> Boiphetolelo ke bja magareng. Bontši bja dikgopolo bo a kwešišega. 	Meputso 5–8 <ul style="list-style-type: none"> Boiphetolelo ga se bja go kgotsofatša Dikgopolo ga di hlalošwe ka botlalo. 	Meputso 0–4 <ul style="list-style-type: none"> Boiphetolelo bja maemo a fasefase. Dikgopolo di hlakahlakane.
SEBOPEGO LE POLELO Tlhalošo ya sererwa. Tatelano le tlemagano ye botse ya dikgopolo. Tšhomišo ya polelo le mopeleto wo o nepagetšego, segalo le setaele e be tša maleba.	10	Meputso 8–10 <ul style="list-style-type: none"> Tlhalošo ye e tseneletšego ya sererwa. Diphošo tša mopeleto ke tše dinnyane. Polelo, setaele le segalo ke tša maemo a godimodimo. Sebopego se tšweletša tatelano le tlemagano ye botsebotse ya dikgopolo. 	Meputso 6–7 <ul style="list-style-type: none"> Tlhalošo ye botse ya sererwa. Diphošo tša mopeleto ga se tše dintši. Polelo, setaele le segalo ke tša maemo a godimo. Sebopego se tšweletša tatelano le tlemagano ye botse kudu ya dikgopolo ebile di a kgahliša. 	Meputso 4–5 <ul style="list-style-type: none"> Tlhalošo ya magareng ya sererwa. Diphošo tša mopeleto ke tša magareng. Tirišo ya polelo, segalo le setaele di a kgotsofatša. Sebopego se tšweletša tatelano le tlemagano ye botse ya dikgopolo. 	Meputso 2–3 <ul style="list-style-type: none"> Tlhalošo le kwešišo ya sererwa ke tša motheo. Diphošo tša mopeleto ke tša magareng. Tirišo ya polelo, segalo le setaele di a kgotsofatša. Sebopego se tšweletša tatelano le tlemagano ye botse ya dikgopolo. 	Meputso 0–1 <ul style="list-style-type: none"> Ga go na tlhalošo ya sererwa. Polelo ga e kwešišege e tletše ka diphošo tše dintšintši tša mopeleto. Sebopego ga se sa maleba. Dikgopolo di hlakahlakane.

RUBRIKI YA GO SWAYA DITŠWELETŠWA TŠA TIRIŠANO

Dinyakwa	Kelo Meputso 20	Bokgoni bja go ikgetha	Bokgoni bja maemo	Bokgoni bja magareng	Bokgoni bja motheo	Ga go bokgoni
DITENG Diteng e be tša maleba. Dintlha di fiwe ka nepagalo ntle le go kgopamiša nnete.	10	Meputso 13–15 <ul style="list-style-type: none"> Bokgoni bja go araba potšišo ke bja maemo a godimodimo. Tsebo ye e tseneletšego ya dinyakwa tša setšweletšwa. Tlemagano ya diteng le dikgopolo ke ya maemo a godimodimo. 	Meputso 10–12 <ul style="list-style-type: none"> Bokgoni bja go araba potšišo ke bja maemo a godimo. Tsebo ya maemo a godimo ya dinyakwa tša setšweletšwa. Tlemagano ya diteng le dikgopolo ke ya maemo a godimo. 	Meputso 7–9 <ul style="list-style-type: none"> Bokgoni bja go kgotsofatša bja go araba potšišo. Tsebo ya magareng ya dinyakwa tša setšweletšwa Tlemagano ya diteng le dikgopolo ke ya magareng. 	Meputso 4–6 <ul style="list-style-type: none"> Bokgoni bja go araba bo laetša tsebo ye nnyane ya go araba mohuta wo wa potšišo Tsebo ya motheo ya dinyakwa tša setšweletšwa. Tlemagano ya diteng le dikgopolo ga e kgotsofatše 	Meputso 0–3 <ul style="list-style-type: none"> O paletšwe ke go fihlelela ditekolo. Ga go na tlemagano ya diteng le dikgopolo. Dikgopolo di hlalošwa ka boripana.
SEBOPEGO <ul style="list-style-type: none"> Sebopego sa maleba le botelele bjo bo lekanetšego. 	4	Meputso 4 <ul style="list-style-type: none"> Sebopego ke sa maleba sa go sepelelana le setšweletšwa. 	Meputso 3 <ul style="list-style-type: none"> Sebopego ke sa maleba eupša se na le diphošwana tše mmalwa. 	Meputso 2 <ul style="list-style-type: none"> Sebopego ke sa maleba eupša se na le diphošo tše dintšinyana. 	Meputso 1 <ul style="list-style-type: none"> Setšweletšwa ga se tšweletše sebopego sa maleba, se tletše ka diphošo. 	Meputso 0 <ul style="list-style-type: none"> Sebopego ga se sa maleba

SETAELE LE POLELO		Meputso 5–6	Meputso 4	Meputso 3	Meputso 2	Meputso 0–1
Retšistara, segalo, mohola, tlotlontšu, tlhamego ya mafoko le mopeleto, maswaodikga, tšhomišo ya polelo ya maleba.	6	<ul style="list-style-type: none"> Polelo le tlotlontšu di hlamegile ebile di na le maatlakgogedi. Ga go na diphošo tša mopeleto. Segalo, retšistara le setaele di sepelelana kudu le morero. 	<ul style="list-style-type: none"> Polelo le tlotlontšu di hlamegile gabotse. Ga go na diphošo tše dintši tša mopeleto. Segalo, retšistara le setaele di sepelelana gabotse le morero. 	<ul style="list-style-type: none"> Polelo e a kgotsofatša fela e na le diphošwana. Diphošo tša mopeleto ke tša magareng. Segalo, retšistara le setaele ke tša maleba. 	<ul style="list-style-type: none"> Polelo ga se ye e nepagetšego ebile e tletše ka diphošo tša mopeleto tšeo di hlakahlakanyago setšweletšwa Segalo, retšistara le setaele ga di sepelelane gabotse le morero. 	<ul style="list-style-type: none"> Polelo e hlakahlakane ebile e tletše ka diphošo tša mopeleto Segalo, setaele le retšistara ga di sepelelane le morero.

Palomoka: 100